

i FLETËUDHËZUES I PAKETIMIT:
Informacion për përdoruesin

MELIOZOL

Ovula – 500 mg
(Metronidazol)

Lexojeni me kujdes këtë fletëudhëzues përpara se të filloni përdorimin e barit.

- Ruajeni këtë fletëudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efekteve anësore keqësohet ose në qoftë se vëreni ndonjë efekt tjetër anësor që nuk përmendet në këtë fletëudhëzues, ju lutemi të njoftoni mjekun ose farmacistin tuaj.

Në këtë fletëudhëzues:

1. Çfarë janë ovulat Meliozol dhe përse përdoren
2. Përpara se të përdorni ovulat Meliozol
3. Si t'i përdorni ovulat Meliozol
4. Efekte anësore të mundshme
5. Si t'i ruani ovulat Meliozol
6. Informacion i mëtejshëm

1. ÇFARË JANË OVULAT MELIOZOL DHE PËRSE PËRDOREN

Ovulat Meliozol përmbajnë lëndën vepruese metronidazol. Metronidazoli, një rrjedhës sintetik i nitroimidazolit, vepron kundër mikroorganizmave anaerobe gram – pozitive dhe gram – negative (lloje të *Bacteroides*, përfshirë grupin bakteror të *B.fragilis*, lloje të *Clostridium*, lloje të *Eubacterium*, lloje të *Peptococcus*, lloje të *Peptostreptococcus* dhe kundër protozoarëve (*Trichomonas vaginalis*, *Entamoeba histolytica* dhe *Giardia lamblia*). Mekanizmi i veprimit të metronidazolit ende nuk është sqaruar plotësisht. Mendohet se metronidazoli frenon sintezën e ADN-së. Ai ushtron veprim baktericid.

Ovulat Meliozol përdoren në:

- trikomoniazën urogenitale femërore (*Trichomonas vaginalis*);
- vaginozë bakteriale (njohur ndryshe si vaginit jospecifik, vaginozë anaerobike ose vaginiti *Gardnerella*).

Mjeku juaj mund ta ketë dhënë Meliozol për një qëllim tjetër. Pyesni mjekun tuaj në qoftë se doni të dini pse ju është dhënë ky bar.

2. PËRPARA SE TË PËRDORNI OVULAT MELIOZOL

Mos i përdorni ovulat Meliozol në qoftë se vuani nga mbindjeshmëria ndaj metronidazolit, ndaj rrjedhësve të tjerë të nitroimidazolit ose ndaj përbërësve të tjerë të ovulës.

Tregoni kujdes të veçantë me ovulat Meliozol

Nuk duhet të konsumoni pije alkoolike gjatë mjekimit me metronidazol dhe të paktën edhe 48 orë pas

përfundimit të mjekimit, sepse ekziston rreziku i shfaqjes së një reaksioni të ngjashëm me disulfiramën.

Metronidazoli duhet përdorur me kujdes në sëmundjet aktive të sistemit nervor qendror, përveç abscesëve të trurit, në pacientët që i nënshtrohen dializës dhe ata që kanë probleme të gjakut.

Po ashtu duhet treguar kujdes edhe tek të sëmurët me dëmtim të funksionit të mëlçisë, në periudhën e shtatzënisë dhe të ushqyerjes së fëmijëve me gji.

Raste me toksicitet të rëndë të mëlçisë ose mosfunksionim akut të mëlçisë, duke përfshirë edhe rastet me rezultat fatal, janë raportuar në pacientët me sindrom Cockayne për produkte që përmbajnë metronidazol.

Nëse jeni të prekur nga sindromi Cockayne, mjeku juaj duhet t'ju monitorojë shpesh funksionin e mëlçisë gjatë kohës që jeni duke u trajtuar me metronidazol dhe më pas.

Njoftoni menjëherë mjekun dhe ndaloni marrjen e metronidazolit në qoftë se ju shfaqen:

dhimbje stomaku, mungesë oreksi, të përziera, të vjella, ethe, dobësi, këputje, iktër, urinë me ngjyrë të errët, feçe me ngjyrë gri ose kruajtje. Këshillohet monitorim i veçantë i pacientit nëse trajtimi zgjat më shumë se 10 ditë.

Marrja e barnave të tjera

Trajtimi i njëkohshëm me barna të tjera mund të ndikojë ose të ndikohet nga ovulat Meliozol. Ju lutemi të kontaktoni me mjekun ose farmacistin tuaj në qoftë se jeni duke marrë / përdorur ose keni marrë / përdorur kohët e fundit barna të tjera, përfshirë ato të marra pa recetë. Mos harroni të informoni mjekun tuaj për trajtimin me Meliozol në qoftë se ju jepet ndonjë bar tjetër gjatë trajtimit.

- Kur jepet me alkoolin, metronidazoli mund të provokojë një reaksion të ngjashëm me disulfiramën tek disa pacientë.
- Janë vërejtur psikoza akute ose konfuzion të lidhura me përdorimin e njëkohshëm të disulfiramit me metronidazolin.
- Është raportuar një dëmtim i metabolizmit ose ekskretimit të shumë barnave duke përfshirë: varfarinën, fenitoinën, litiumin, busulfanin dhe fluorouracilin duke shkaktuar një rritje të incidencës së efekteve anësore.
- Mendohet se fenitoina mund të përshpejtojë metabolizmin e metronidazolit.
- Përqëndrimet plazmatike të metronidazolit zvogëlohen nga fenobarbitali duke sjellë një reduktim të efektivitetit të metronidazolit.
- Cimetidina rrit përqëndrimet plazmatike të metronidazolit dhe mund të rrisë edhe riskun për efekte anësore neurologjike si rezultat i trajtimit me metronidazol.

Shtatzënia

Njoftoni mjekun ose farmacistin tuaj në qoftë se jeni shtatzënë ose po planifikoni të ngeleni shtatzënë. Metronidazoli është mutagenik tek bakteret dhe karcinogjenik tek brejtësit. Kalon lehtësisht barrierën

placentare duke arritur aty përqëndrime të ngjashme me pjesën tjetër të organizmit. Për këtë kundërshtohet përdorimi gjatë shtatzënisë.

Ushqyerja me gji

Metronidazoli ekskretohet në qumështin e gjirit duke i dhënë atij një shije të hidhur, e cila mund të dëmtojë ushqyerjen e foshnjës. Rekomandohet mosdhënia e qumështit të gjirit për 12 – 24 orë kur nëna është trajtuar me një dozë të vetme metronidazoli, ndërsa për trajtimet për kohë të gjatë me të nuk ka rekomandime.

Drejtimi i automjetit dhe përdorimi i makinerive

Gjatë kohës që përdorni ovula Meliozol mund të keni: marramendje, përgjumje, konfuzion, konvulsione dhe çrregullime të shikimit. Nëse kjo ndodh, nuk duhet të drejtoni automjete dhe nuk duhet të përdorni makineri.

3. SI T'I PËRDORNI OVULAT MELIOZOL

Gjithmonë përdorini ovulat Meliozol sipas këshillës së mjekut. Në qoftë se nuk jeni e sigurt, kontaktoni me mjekun ose farmacistin.

Ovulat janë për përdorim vaginal. Ato nuk duhet të gëlltiten!

Doza e rekomanduar është 1 ose 2 ovula në ditë dhe 5 tableta nga goja.

Në qoftë se keni përdorur më shumë ovula Meliozol sesa duhet

Në qoftë se keni përdorur aksidentalisht një mbidozë ovulash Meliozol, kontaktoni menjëherë mjekun tuaj ose spitalin më të afërt.

Në qoftë se harroni të përdorni ovulat Meliozol

Mos përdorni një dozë të dyfishtë (ose më të lartë) për të plotësuar dozën (dozat) e harruar(a). Në qoftë se keni pyetje të mëtejshme mbi përdorimin e këtij produkti, pyesni mjekun ose farmacistin tuaj.

4. EFEKTE ANËSORE TË MUNDSHME

Si të gjitha barnat e tjera, Meliozol mund të shkaktojë efekte anësore, megjithëse jo çdokush i manifeston. Metronidazoli tolerohet mirë në dozat e rekomanduara. Njoftoni mjekun tuaj për efektet anësore të mëposhtme që mund t'ju shfaqen:

- çrregullime të lehta gastrointestinale (të përziera, të vjella, dhimbje barku, shije metalike, tharje goje, ose rrallë diarre);
- reaksionet e mbindjeshmërisë (angioedema, ekzema, urtikarie, reaksione të rënda të lëkurës) janë të rralla;
- reaksione të padëshirueshme neurologjike (dhimbje koke, marrje mendsh, përgjumje, ataksi, konvulsione, encefalopati, neuropati periferike, sindrom cerebelar, konfuzion, çrregullime të nervave, çrregullime psikotike, halucinatione, depresion);
- ngjyrë e errët e urinës;
- çrregullime të shikimit;
- çrregullime të dëgjimit, zhurmë në vesh (tinitus);
- inflamacion i mukozave (mukozit);
- neutropeni kalimtare;
- humbje oreksi;
- pankreatit, çrregullime të mëlçisë, të cilat mund të shfaqen në raste shumë të rralla;

- pancitopeni, agranulocitozë, trombocitopeni dhe leukopeni;
- dhimbje muskujsh, asteni;
- meningit aseptik;
- ovulat vaginale mund të shkaktojnë irritim të lehtë të mukozës së vaginës, kurse çrregullimet gastrointestinale janë shumë të rralla.

Në qoftë se ndonjë prej efekteve anësore përkeqësohet, ose në qoftë se vëreni efekte anësore që nuk përmenden në këtë fletëudhëzues, ju lutemi të lajmëroni mjekun ose farmacistin tuaj. Kur shfaqet ndonjë nga efektet anësore të mësipërme, mjekimi me Meliozol duhet ndërprerë dhe ju duhet të këshilloheni me mjekun ose me farmacistin tuaj.

5. SI T'I RUANI OVULAT MELIOZOL

Mbajni larg fëmijëve!

Mos i përdorni ovulat Meliozol pas datës së skadencës.

Mos i ruani mbi 25°C!

Ruajini në paketimin origjinal për t'i mbrojtur nga drita dhe nga lagështia!

6. INFORMACION I MËTEJSHËM

Çfarë përmbajnë ovulat Meliozol 500 mg

Lënda aktive është metronidazoli.

Çdo ovulë përmban 500 mg metronidazol.

Lëndët ndihmëse janë: dioksid silici koloidal dhe yndyrna të ngurta.

Përmbajtja e paketimit

Kuti me 10 ovula

Shpjegues i ikonave ilustruese për paketim:

 Ovula.

Mbajtësi i Autorizimit të Tregtimit dhe Prodhuesi:



PROFARMA Sh.a.
Rruga "Skënder Vila",
Tiranë, Shqipëri.
Tel.: +355 4 23 89 602

Ky fletëudhëzues u rishikua për herë të fundit në Tetor 2023.

 SPECIFICATION



CROPING AREA 12 x 19 cm

PAY ATTENTION, all the layers are visible. If you have to print this document please check or uncheck the specific layers.